

主編 黃靈庚 陶誠華

上海古籍出版社

金華宗譜文獻集成

7

金華宗譜文獻集成

七

東陽市委宣傳部 編

目錄

金華宗譜文獻集成（東陽宗譜二） 東陽市委宣傳部編

單國燼輯

胡下

一

東南湖胡氏宗譜

一

賈

一六一

真定賈氏宗譜

一六一

金

一八七

五居長林金氏宗譜

一八七

劉

二一九

東陽長林劉氏宗譜

二一九

東陽劉金氏宗譜

二二三

呂

二六七

東陽象岡呂氏宗譜

二六七

東陽大化呂氏宗譜

三二七

東陽南湖呂氏宗譜

三四〇

陸

三四九

東陽陸氏宗譜

三四九

厲

四九九

東陽厲氏宗譜

四九九

胡下

東南湖胡氏宗譜

胡氏世譜序

余與胡君祐之相距二舍許，媼盟甚密，其箕裘燕翼莫不相聞。一日君以伯兄子升所修世譜來請序於余。余邇胡之先出於帝舜，有虞氏之胄，自周武王封媯滿於陳，配以元姬及薨康王，以其年躋胡考謚曰胡公子孫，遂以爲姓。及楚滅陳而子孫散處四方，乃於湖之雪川居焉。梁大同間有諱佑者爲廣信郡守，歷陳隋以至於唐而登仕版者代不乏人。至十五世有郡馬公諱神者爲仙居令，寓居南湖，因而家焉。更七世始別爲東南兩湖，東祖主簿南祖監鎮而家聲丕振。主簿捨其所居宅爲覺明寺，子諱居仁者從學於呂成公，以儒名家。厥孫中行嘗以粟贍貧族而鄉稱善士。至胡君祐之好學篤行，猶爲世所推重，常取法范文正公，創立義庄以成先志。而孫德之爲之記監鎮克樹勳業，子庭芝舉進士任陝西西安郡守，甚德於民。厥孫森衛亦由進士任高郵興化二縣令，大興治理，累世飭躬勵行，班班可攷，詎非吾邑之望族乎？故子升思厥厥宗爲光前裕後之圖而恐後人之迷厥所自也，因取先世所修家牒重加纂輯，參以所聞正其謬誤，用史氏年表之例列其昭穆世次，與夫官爵名行之懿著爲世譜一帙以藏諸家，俾後之覩斯譜者咸知所以尊祖敬宗崇德尚賢而

興起其孝悌之心，以無忝於帝胄，不有賴於茲耶？胡君祐之蚤以明經漕薦上而主管翰林文字，有猷有爲，昭宣令聞，又能繼志述事，爲邦家之光。而君兄子升潛德弗仕，以宗盟爲己任，卒使前人之業日益充拓，而先世之德克昭焉。非二公其孰能勝之？詩曰：無念爾祖，聿修厥德。胡氏子孫其勗之哉！時宋淳祐七年二月八日，賜進士第特進光祿大夫工部尚書前寶謨閣直學士眷侍教生李大同序。

重修譜序

胡氏之譜遠矣。宋季紹聖間，珣府君始續世家，淳祐間我從伯父古拙同我先君更修家牒，名曰世譜。而尚書李公爲之序，方伯父先君修譜時，正東湖南湖盛時，我祖固已歲廩族人，欲創義庄，未就而沒。先君克承其志，爲人國朝至大初，先兄古學再修是譜，萃爲一圖，支分派別，燦然可觀。余嘗序之，是時先兄實主義庄，尚無恙，會因縣道理畝造冊，別立贍族庄，一戶由是歲當差役之費，而租入不能以贍矣。未幾先兄即世，余留京師，子姓莫適爲主，泊余歸，權領之，而時異事殊，理民者不以教化爲意，而惟務貪刻，族人之懷私利已者，亦乘時爲奸，於是質租應役無虛日，而庄且壞不支，無爲善後之計。乃集長幼謀之，僉曰：歲有役戶有米，無米斯無役矣。窮則變，變則通，無泥古無執一，莫若計口分田，以與之均，惠族人而去其籍，可也。斯不亦變通之道乎？余是其言而行之，遂作分義田詩以志焉。雖然，余觀夫近代富家巨室，往往置義庄以贍族，遭世變鮮不廢者，若吾里路西陳氏義庄、陸放翁所記者，內附後輒先壞，時使然也。獨吾家乎？嗚呼！自宋初遷居以來，綿綿延延至於今日數百餘年，支派日益繁衍，祖

宗之澤尚未艾也可不念哉助不肖自幼力學見識迂濶幸而以文學登朝備員史官者再今茲告老而歸爲合族之長閒居無事追憶余往來京師凡三十載而族之後生不能徧識因閱族譜再加修葺而續書之舊譜第一楮具四世次楮則桃其上而續其下殊覺煩贅難見今輒倣歐陽公族譜之法斷自可見之世郎爲高祖至五世元孫而別自爲世以遠近親疎爲別而書有詳略焉嗚呼繼自今凡我族人子孫觀其譜者宜敬念祖宗之澤以有此身相與和睦力行孝弟忠信貧者安而無諂富者遜而無驕仰事俯育之餘勤學讀書出而應舉從仕庶幾君子之歸而不至於下流也詩曰無忝爾祖可不懋哉時至正六年龍集丙戌秋九月九日十一世孫承事郎太常博士致仕煦序

重修族譜世系記序

胡本有虞氏之後至成周爲小國子爵今潁川汝陰之胡城即其地也後楚滅陳子孫分散以國爲氏或又謂周武王謚陳子滿爲胡公其後遂爲胡氏此蓋同出於陳而汝陰之胡尤爲可據世多宗之然而由汝陰散之他處者代多顯人而安定爲望最東南胡氏世居雪川祖諱佑字錫之任江西廣信郡守致仕佑生仁義信仁無子信生衝衝無子義生術衍衍無子術字文彰仕太學監丞生成成生進字先覺任左春坊司直郎進生榮華無子榮生昌仕温州路儒學教授陞翰林院檢討生宏寶寶生玉玉生元道亨道利道元道生高俱無嗣宏生珍字世寶任福建經歷陞通判生美美生巨巨生亮明亮生輔仁輔仁生相桓桓無子相生清靖俱無子明字道古任南昌路儒

學教授陞彼府推官生閏開開無子閏字重光任南昌府進賢縣縣丞生福福生遠神遠遷居永康龍山神字元通號啓齋任仙居令遂遷居東陽之南湖生曹曹生全全生珣珣積累家貲鉅萬始續世家生張奉親仕仕早世張奉居南生航字公濟航生勣字彥功家運中微復自振舉宋承信郎監平江府福山鎮生庭茂庭芝庭芬庭芳庭茂生次公次輔次廣次公生子固起莘起巖子固生達潮勝稱多贍達生衍衡衍生超幼習學超生江海涯幼生汪溥學生淳淑注滿洙淑生戊戌生夢育夢騰夢申夢儀夢育生銑鉉鎮夢騰生銳鏞夢申生銖注生薰圓智覺惟中就中薰生夢吉夢貞夢符圓無子以夢符嗣智覺爲僧號了心起莘生桐起巖生務皆絕次輔生克愿日新秀強友仁克愿生嗣晚嗣生謙桐益謙生雙錢雙生采采生錢德錢生道壽道淵釋道壽生漸中道淵生克中克中生夢庚釋生志中誠中慎中克中志中生夢周夢周生銛誠中生夢得慎中生夢蝶晚生榆楠絕日新生鑒免鑒生彌絕色生高高生燄遊述燄生道榮道鐘道佑道英道榮生閭中履中縕中顯中間中生應元履中生夢復夢清道佑生彥中宜中建中勉中彥中生應祥應宗宜中生應爽應嘉建中生應忱應魁應端汶道英生福真福真生應睿應杰遊無子以道鐘嗣道鐘生福阜福貴福阜生應奇述生道明絕季強生鵬茹生友仁生偉僧偉字才達善謀禦寇有功元初授處州麗水縣尹生棟模棟字虛心好老氏學鄉稱善士生淨觀慧觀淨觀生濬無子以從弟必強子執中嗣慧觀生道臻道益道傳必強道臻生致中道益生處中時中一中一中生蒙莘道傳爲僧必強字宅毅好學有文克裕其家以禮法自持生允中執中模出繼葛氏僧生梁彬和上梁生妙觀

妙觀生道盛道亨道德道盛生養中存中養中生葩道亨無子以存中嗣彬生道印道侑道侑生得安詒安得安生敏中擇中詒安生在中則中持中信中次廣生間薰爲僧庭芝任延安知府生次弼次元森衛次弼生季宏子成子升子臨子成生應絕子升有才不仕嘗修族譜爲序生鑑鑑生耕耨絕子臨生銓銓生潤清絕次元生寅煥竟絕森衛字德操通武經經書中端平癸卯武舉累階承惠郎知高郵興化二縣事生似翁釋父父似翁生興盛珍祥禪興生嶢無子以弟子演傳嗣盛生岫岫生泗演泗生宗顯宗明宗讓宗熹父無子以兄子珍嗣珍生德康繼主德康生普傳蔭傳普傳生諮誥諮生原中記中繼無子以兄子蔭傳爲嗣圭生勝傳勝傳生諍庭芬生易簡易直易簡生仲虎季隨仲麟仲龍仲虎生欽祖鉉祖欽祖無子以從兄子衡嗣仲麟生恢祖紹祖鎬鎬生琳復繼杓杓生煇煇生澤潤澤生鈞鑄無子以從兄子屋嗣潤生谿谿生堂陞堅屋琳生相傳相傳生謨譽詡仲龍生寶絕易直生仲熊季永季時仲熊生壽壽生桂杓杓生桂生淪潛淪生佛侑瑋佛侑生純中廉中純中生華藻堯廉中生芸葱萱瑋生性中潛生天有天錫天錫生省中得中和中激生道成道載道環道成生用中剛中道載生本中清中軒中道環生敬中燁中呆生顏沉漳顏生協偕協諄協偕生讓中義中亮中達中協諄生禮中文中由中沉生協保協琪詵協琪生理中漳生誠誠諷生秉中宏中堅中銘中誠生定中立中正中庭芳生次庸次華次良次庸生季武絕次良生璉璉生建惠建生供絕親居東生奎淞景略奎生翱宋贛州寧都主簿棄官隱居好釋氏學捨所居宅爲寺生庭璵居仁適中庭珙庭璵生敏徹敏敏生開閭閭開生麒麟絕閭生主立輒

生閭敞生闡關閭閭生聰興絕居仁師東萊呂成公有學行生中實中行中實生椿年表年椿年生承祖承祖生與濤師道師德與濤生頤鈞啓頤生天生壽生佛生申生啓生奇生的生道全的生爲僧號斷雲師道生濟慶歡中行字德興勤篤起家富雄於鄉首推賑族人嘗捐田壹千畝學范文正公法爲義庄生祐之宗寬祐之字天錫宋鄉貢進士任國史實錄院主管翰林文字才敏有志略克振先業遂立義庄以成父志以子貴元贈秘書郎生澄斗祥槐通觀難與賦照澄宋登仕郎蚤夭以永康徐無黨之裔孫君聘來繼宋鄉貢進士元初紫微使鄂國公領兵至鄉以招捕有功薦提舉不報生的傳心傳世傳的傳字端友號太古以文字稱善晉書生道生道保道生無子以弟子積慶嗣生夢岳道保歸宗徐氏祥宋登仕郎亦夭以縉雲朱氏子君選來繼無子以兄子世傳嗣字壽朋號秋白生道隆字子盛清修好古多蓄名書畫玩器善琴書生必慶積慶善慶必慶生夢生夢孫夢生生鈺夢孫生鉅善慶生夢弼夢良與生琦珣珣珣琦字元珪有隱德鄉以行義稱生正傳景傳正傳字師道穎悟明達人推服之生讓誠誼諄諄讓生承慶有慶諒生顯慶一慶衍慶珣無子以兄子景傳嗣字宏道學通經史國初鄉貢進士爲洛陽觀城縣令既明經中式累官雲南廣西府知府所至皆有能聲生謙謚謚玠生茂傳永傳忠傳忠傳生源諄諄諄諄無子以兄子永傳嗣賦生琇琇生道傳助字古愚元太常博士以文鳴所著有純白齋類稿若干卷行於世生璋瑜璋字伯玉元遠陽高州儒學學正生文傳學傳科傳文傳生訥誘誦學傳生謹諤謙謹科傳生訓諤詢詔詠瑜字季誠以父蔭入官任陽朔主簿權賀州同知事卒於官生朋壽端壽奕壽歸壽端

壽字修齡克世家學善屬文今爲本邑儒學訓導生鵬奕壽生訥適中生徽肇徽生穎祖俊祖生道憐俊生軻肇生衍庭珙生敬潮真敬生登絕教生勢勢生惇禮達上友惇禮生知及助源勛生庭瑞如式源生頌智達生淵淵生庭植庭植生次榮次興絕上友生中庸泳必忠泳生庭堅庭照夫自始遷至今四百年餘凡十有七世家牒累修固爲可考但人世以下人自爲第無以明其尊卑之序十三世孫宏道始議一其行舉譜牒而修明之未成以貢舉赴京遂以其編屬之族姪必強書成而宏道亦謝事歸田且十有餘年矣近以來裔日繁乃與必強謀將續書之僧智覺族系也奮然慕義不以僧俗有間旦夕孜孜以竟其事既成以記序爲屬誠夫嘗觀尚書李公之序既有感於心況誠夫與必強實同從祖兄弟義不可辭因記其世次枝分派衍等第而書之顧以行邁有期不能精覈姑記所聞以俟知者嗚呼胡氏之族可謂盛矣祖宗之澤可謂厚矣自夫東南二族之分子孫日以蕃衍通詩書登仕版者代有其人光輝赫奕蔚爲吾邑鉅族豈非先世積累之厚有以衍其慶歟爲子孫者宜益自振飭以興其宗使夫嘉績懿行累書不絕可也凡先世墓銘行狀名公之所著述多散軼不存今廣爲搜訪得若干篇謹附斯譜之末後之覽者尚有所興感焉時洪武十六年歲次癸亥十一月十五日湘府伴讀葛誠夫序

重修族譜序

族之有譜其來久矣而族巨者譜系不可不明譜法不可不備系不明則無以詳世次之序而繫姓者無別法不備則無以紀支派之繁

而綴藉者易疎立譜有系所以尊尊也續譜有法所以親親也尊尊親親而仁義之道著焉孝子順孫之情由是達焉矣此固古人之所慎重而不敢輕視者也余嘗讀氏族誌世家傳而知東陽之有胡氏族之巨者也世次之先後支派之蕃衍見於胡珣子升之所識尚書李公大同之所序侍讀葛誠夫之所記而博士古愚之所傳太守宏道之所囑必強執中之所書仲明濂耕樂齋恕之所述舉而踵成之者果無遺矣今三峰先生諱機者實必強之五世孫近因譜牒之未詳深懼來裔之莫究而名次等第或失則紊而無別也乃捐己資命諸公之多聞者詳加考覈肆搜羅上自貞元七百餘年之遞遷下至我朝百八十餘年之嗣續凡不係兵火之散佚而昭然可紀者俱不以門第之隆替時事之盛衰與居室之遺邇等第之親疎而悉次其先後本末緬惟祖宗之澤不可斬支派之流不可分懷葛藟本根之庇廕行葦莫遠之情而嚴垂訓式嗚呼先生之用心於族譜亦可謂義之盡仁之至矣是故以義率祖而上焉者罔不尊尊以仁率而下焉者罔不親親孰非由是舉而倡之哉或曰譜系莫詳於氏誌譜法莫備於世傳而後世司馬氏之所載歐陽氏之所修眉山蘇子之所撰定雖各爲一家而稽之傳誌靡不各有所合然則先生之於譜哀然成集而細大不捐且能明宗統以正其綱附分合以紀其目庸非備羣譜之所未備而超然會諸儒之粹者乎夫先生抑何爲而及此也再讀張廷堅所傳盧氏節婦行狀知先生乃宋監鎮彥功後厥孫縣尹偉元博士古愚翁之華胄今伯敬翁之孫叔深翁之令子也仕於朝者代不乏人而孝友嫺睦令德懿行名世者難以枚舉叔深早年遭疾不起母盧氏抗節撫而育之迄成大儒不樂仕進而孝友

之德聞於內外凡遇時祭祀必拊膺以痛父接族屬之卑幼雖甚疎遠者必加以禮見宗黨之長者每語之以厚人倫美風俗之意謂譜義不明則衆散無紀相聚不相識視猶路人求其骨肉之無相疎不可得也故毅然爲此修舉而世次之本源支派之奕葉一開卷瞭然而且於吉凶嫁娶之儀月會歲聚之法東南二派東祖主簿南祖監鎮而家聲益以大彰主簿之子居仁從學於東萊呂成公以儒名家厥孫諱中行者勤篤起家嘗捐田千畝以賑貧贍族而鄉稱善士其子祐之仕國史實錄院主管文字才敏有志操克振先業法范文正公爲義庄以竟成先志厥子煦字古愚者仕太常博士其文才盛爲吳草廬先生所推仰所著有純白齋稿傳於世越二世諱景傳字宏道以鄉貢進士爲洛陽觀城二縣尹既而明經中式累官雲南廣西府知府所至皆有能聲今十九世孫名仁卿字子元者由國子生任南京江陰衛經歷監鎮之子諱庭芝舉進士官至陝西西安郡守其子諱森衛仕爲高郵興化二縣尹又二世有諱偉者以武功授處州麗水縣尹今名朝綱字廷振者由貢士任江西貴谿縣學司訓其方來接武者又皆玉簫蘭茁彬然未艾蓋自遷居以來傳六百有餘年合其指殆不啻數千其膏腹連阡亘陌遍於數鄉而仕宦則繩繩不絕此其稱爲鉅族也有由然哉其譜始修於四世孫珣曰續世家淳祐間十世孫子升又重修之曰世譜其甥工部尚書李大同爲之序至正間博士煦又重校正之既明且備矣至正丙午十三世孫文傳又續之至我朝洪武壬子十四世孫必強又重續之而洪武癸亥十三世孫景傳初仕告歸又取而再緝之迨至正統丁巳則十五世孫執中又續而重修之弘治甲寅十六世孫濂又於行次之後加以康

泰興仁德賢良道義嘉十字修而葺之正德丁丑十八世孫恕又重修之嘉靖己酉十九世孫機又重修之而請序於姚江吏部侍郎謝公丕今萬曆丙子其族彥東湖垞南湖煬等又續而重修焉蓋自有譜以來今且凡十一修矣何胡氏之賢思彰世美而不墜其家聲也有如是哉越今年修成人梓矣其族長遣在庠曰朝紳曰以化責禮幣謁余爲之序曰願假名筆以垂不朽余惟古之稱不朽者太上立德其次立功其次立言夫胡氏之先世令聞足垂後法以立德則如居仁公之以儒名家中行公之鄉稱善士可法也以立功則如森衛宏道公之爲縣尹知府所至皆有能聲可法也以立言則如純白漁隱之文才爲人所推仰其遺稿足以傳世可法也是在胡後之自懋而已矣懋不懋非余之所能及也若毫言以加於首則爲佛頂著穢以殿於後則爲狗尾續貂其何益於鉅族之名譜也聊是爲序時萬曆四年歲次丙子孟春之吉賜進士出身奉政大夫前福建按察司僉事致仕奉詔進階一級永康眷侍教生晉庵應廷育拜撰

東南胡氏重修宗譜序

吾婺東故家遺俗大都龐篤秉古禮而晚近破觚斲圜循實沿陋靡然成風惟吾西南鄉多守故其衣冠禮樂彬彬間之左右未有若興賢鄉胡氏者也初東湖之南洲文學公與先中丞爲壻友由令子號心南迨家孫孝廉字孟一者與余三友雅交習其家老揖讓周旋秉先哲度未嘗不徘徊而贊嘆之會今孝廉率族輯譜告成事徵言弁之首簡余則何辭竊惟宗必有譜所以明宗收族譬木之繁衍蔭茂雖聯絡必自條分雖疎密必自縷晰以故郁郁青青爲原麓雄觀也

巨族之詳世次支派不猶是哉故譜之系統承第昭穆此槩之達於顯蒙者也酌義例慎紀載此旨之明於勸戒者也若乃契精傳神箕裘遐遠綿瓜於颺邈委於源魯主之弓球尚守王孫之燕雀靡他致足嘉矣間嘗考原世系其先五代季雪川有諱福公者生二子伯曰遠遷居永康之龍山仲曰神公爲仙居令便道卜居吾邑之南湖此爲第一世祖也遞傳七葉宅分東南二派自是家聲大振尚義興文賢者代起宋則郡馬神公肇始而東之主簿南之監鎮興焉至以鴻儒名有從學東萊公諱居仁者以善士稱有捐田千畝創厥義莊諱中行者其文學也祐之公國史實錄主管文字暨元煦公字古愚太常博士著稿行世於主簿益光監鎮之子諱庭芝舉進士爲陝西西安郡守而知高郵興化二縣事森衛公復繼之處州麗水縣尹諱偉者又繼之至我朝國初宏道公明經中式累官雲南廣西中憲今名仁卿字子元者經歷南京江陰衛又名朝綱字廷振者由貢士司訓貴谿儒學均與孝廉孟一交輝此爲文獻三朝也且余覽眺胡族間其宅負山帶湖林木蓊鬱層巒聳翠於雲霞澄瀨流丹於結構山川靈氣擅勒馬之南蔚爲人文積而方吐則自茲以往縉紳文學知必繩繩相繼輝映西南爲吾婺東光者正未有艾也至年表世次之著俾後人知尊祖敬宗崇德尚賢興孝興悌以無忝故家之風余不復贅時萬曆四十五年歲次丁巳冬十一月賜進士第資政大夫都察院右都御史奉敕總督兩廣軍務前協理院事都察院左副都御史巡撫江西左副都御史吏兵二科都給事中侍經筵講官眷侍教生許弘綱頓首拜撰

東南湖胡氏重修宗譜序

敦本敬宗合族萃渙禮之大者也考源流辨親疎列世次義之著者也禮人之幹也義事之宜也立人之幹立事之宜孝友以成風惇睦以叙族則一家之政行矣胡氏上世世居雪川其遷於東陽興賢鄉之南湖則自仙居令神公始原其始遷以及於今祀歷八百代更四姓繼繼繩繩名人傑士紆組結綬者疊踵於其間其傳世久遠良云盛哉閱仙居令七世乃分爲東南二派南祖監鎮東祖主簿雙峙鼎盛子姓繁衍從其所拓以名其居也然能推明宗派以綱維族姓而著之譜牒則始於宋紹聖三年四世祖珣至元而太常博士煦繼之及明季中順大夫永清又繼之修凡十有二其間舉不違時悉昭世叙用能恪守前訓不替宗盟至於今爲望族歲戊午令上即位十七年東南二派聚財鳩工續前修載懼廢缺也三載既成問序於余余以爲不考其自出無以知前世肇造之由不別其類生無以知後來派分之漸葉生於幹而蔽其本根流出於源而澄其紛緒非獨胡氏之譜宜爾也尊卑先後行類疎戚覲而不及知則途之人而已矣且地隔則慶吊不相聞時久則生齒失其序族疎而法不能一則嫁娶失其因開卷瞭然然後有正之此世俗之所同其譜條例約法善惡必書患難相扶持毋以富而驕貧毋以而強凌弱不平鳴於家督毋得告訐成風此胡氏之所獨也夫風俗之蠹壞極矣誠使親親道行卹患難鮮告訐貧富不相耀強弱不相噬亦庶乎合子孫之衆而齊之以禮哉胡氏與余族姻婭鱗比嘉其秉禮度義而紹前事於不忘也不辭固陋序以詒之時康熙歲次庚申年桂月之吉癸丑進士吏

部觀政眷侍教生趙衍頓首拜撰

東南湖胡氏重修譜序

東陽婺名區也辛亥歲余膺簡命承乏茲土閱今六載世家巨族轍迹幾遍矣距城六十里許曰東南湖實峴南望族也稽其發祥則自宋初時從雪川來有諱神者爲恭懿王郡馬仕仙居令任滿道經東陽選勝得南湖而始家焉嗣後子姓日繁分處於東名材輩出歷宋元明以迄我朝幾八百載縉紳賢士接踵而起余公巡南郊屢過其地覘遺址閱勝境接其禮樂文章輒流連不忍置今年春胡族有事家乘余奉命北上將行都人士以其序屬余因取巔末而備覽之益知其貽謀遠而流澤長也自肇遷暨七葉東祖主簿南祖監鎮主簿之子學論公諱居仁從呂成公遊得理學薪傳監鎮之子曰庭芝舉進士官陝西西安郡守聲名藉藉居仁公子諱中行捐田千畝有奇賑貧族以積功創業高郵興化二縣令森衛公時稱忠孝繼郡守志焉自是家聲丕振國史實錄主管文字祐之公才學爲世推重法范文正公義庄以成厥考志而子諱助字古愚者官太常爲元名儒其文學備著純白齋諸編暨明宏道公以明經登賢書累官至雲南廣西知府有能聲其諱偉者以武功授處州麗水縣尹時諸名公均以大材小用爲惜有徵仕郎諱仁卿由國子生江陰著績功懋褒封二嗣朝縉朝京一繼父職一登武縣既而名朝綱者由副貢任江西貴溪縣學司訓著述文稿猶存孝廉永清公仕臨江知府陞蒼梧道以前知豐潤縣守節崇祀鄉賢其登仕佐郎名之豹準咨超擢榮綸錫焉迨本朝汀州上杭縣令諱之灝以戎功聞而節孝一門之王氏暨

子良洪恩施享祀爲史乘光迄今敦族誼修會朔明世系正名定分凜然秩然如懸書之不苟國憲之莫踰家範聿昭衣冠濟濟其淵源厥有自哉竊願爲胡氏後者繼志述事奮然興蹶然起建豎鴻猷光大祖烈仕秩名宦懿行嘉言以似以續由家乘而登國史將不惟峴南望族爭輝一邑而婺郡名區與有生色矣是爲序時乾隆元年歲次丙辰春二月之吉賜進士第知東陽縣事加二級紀錄五次欽陞內部主事蒲陽姚思恭頓首拜撰

東南湖胡氏續修宗譜序

國有史而後盛衰治亂可以稽家有乘而後長幼親疎可以辨家與國無二致也余自丁卯初冬秉鐸是邑問俗之餘竊見東邑人士崇儉黜奢敦本睦族綽有古人遺意而於譜學尤兢兢焉今年春余因募修東齋事乘籃輿遍遊各都道經東南湖偶詣胡氏宗祠少坐片刻時值續修宗譜諸宗人與梓人咸在其中既而旋署秋間廩生胡源忽以宗譜一冊見示併請序於余余受而閱之乃知胡氏系出帝舜之後蓋自武王克商封舜之後嬀滿於陳配以元姬及其薨也康王以其壽登胡考謚曰胡公其子孫遂以胡爲氏陳於周爲小國今潁川汝陰有胡城即其地也及楚滅陳子孫散處四方而居雪川者代多偉人最爲望族宋初其祖有郡馬神公由雪川而來作仙居令者解任時過南湖愛山水之勝而遂家於此至七世而東祖主簿南祖監鎮始別爲東南兩湖由是家聲丕振縉紳賢士接踵而起有得呂成公理學之傳者有效范文正公義田之舉者有以武功卓著而膺封典者有以節操端嚴而祀鄉賢者他如內而詞林太常外而郡

守觀察一時文章政績史不絕書迄今溯厥淵源益以知其貽謀遠而流澤長也余承乏東齋于今三年愧未能謹庠序之教以申孝弟之義然爲士者誠能尊祖敬宗繼志述事親其親而長其長則士習以端民性以復即謂克諧蒸又以之媲美虞帝無難矣況明德之後必有達人胡氏之興正未有艾今日修家乘之人即異日修國史之人誦前人之清芬續先世之令緒將見科名鵲起甲第蟬聯余於東南湖有厚望焉是爲序時同治九年九月既望日東陽學教諭武林程世桂拜手謹撰

重修宗譜後叙

夫家之有譜也雖以系氏族之源流別遠近之同異然闡先德以示繹思廣紀載以昭文獻公筆削以寓勸懲其大義有同於史豈但昭穆不淆長幼由辨與委巷單門之共率由已哉是以罪莫甚於不孝而譜踰時不修蘇明允以其罪坐之非苛也亦惟是開物成務有典有則以貽孫子法祖善族信風教之有以焉爾其要若此其防若彼然巨族世家率多缺略寧盡乏慈順之心而甘蹈謬戾之行乎嘗索而原之其弊有四其一謂是數百年曠而未舉也前豈乏才吾質貿然微功於一旦難矣其一閭族之所公任也吾方旦暮之不暇而暇爲不亟之圖顓蒙不知賢智知之而巧爲退避其一公帑告誅費安從需其一奉公筆削怨謗多其釁隙嗟嗟知我罪我義在春秋闡明祖訓約敕族人何怨謗之足虞也公貲歲仞原備公需權衡緩急寧供無益之糜爛委曲協劑亦有通變之法術遺義往昔悉力以續前緒猶懼其不蚤也而牽於旦暮畏及首尾齊賢智於顓蒙居輒負

才憤惋於無所試事當其身何靡靡也噫挾私玩公積弊成俗非一家一日然矣是以衣冠代不乏人而茲典久缺多由不孝之耳目數謀數寢今胡氏偕六載詎謂見聞頗廣但永言先德當其身而再委之無以追不孝責耳猶慮綿力任重圖究厥終之難所幸二三家老之肩一心也譜既成而遺文靡軼義例精明訂政豕亥易抄本以剖劂名爲修而功埒於創東湖曰垵曰垵曰垵曰垵曰垵曰垵曰垵曰垵曰朝瓊曰朝麟南湖曰枝曰煬曰球曰鳳曰德曰鷹榮海曰城曰堯曰雷曰大器曰亨禹相與翌成用卿號南洲者參閱今雖郎世義所當書者也遂均書其名以示胡之後人時萬曆五年歲次丁丑仲春上澣之吉賜進士第中憲大夫廣東按察司副使前山西道監察御史眷侍教生震所王乾章拜撰

胡氏宗譜跋

胡氏自宋郡馬公仙居令啓土分築綿延儒素相繼迄今八百餘載聲名文物之盛甲於郡邑鄉邦傳世若斯之著也良以其先世昭令德以遺其子孫其後嗣處時盛而持戒盈滿用能紹述家法祇祇畏不忘前事於寢興夙夜間故至此其間若元中秘之博洽能文進退有道若明中順之分符拒寇盡職守官志於先德以飭後緒此尤彰彰者而置義庄以卹貧之尚義舉以奉先者多有其人故嗣而續之間未嘗忘大雅篇什贈貽文獻之藏時有故木在宗祐亦足徵後嗣之賢矣今戊午之役房舉派徵擇其賢能以襄事勤敏既奏咸與有成勞焉固宜書之不遺以見繼志述事崇宗睦族意也至輯熙舊典而繩繩相繼令自宋暨元及明歷代文獻聿昭世美舉凡詩書禮

義孝弟忠信以克紹前緒於勿替者又在後人乎時康熙十九年歲次庚申桂月望日之吉眷侍教生虞奕芝謹撰

省齋翁胡老先生九旬壽叙

今將登度索而餐金霧游須彌而咽玉糝青衣禮北斗之九星黃露飲東方之一合天元第三十六洞素號仙鄉上壽登百二十年猶非丹訣雖或真人其果有要稟異氣之自然然而形以神存命由性立一溉亦益乎嘉穀百斛可望乎良田賀亢有大還丹斬相見夫玉局嵇康著養生論恕可比夫羨門惟浴素而淘亢自根深而蒂固此則許瓊之一官就養不減古強應璩之三叟致詞無須天貴者也恭惟我省齋老伯大人前山望族定水幽居海口山顙得壽者相穀仁飭義與古爲徒探石鼓之奇文維魴辨字誦瓦當之古篆共鶴延年吟水石於秋潭醉烟霞於春圃自謂得榮期之樂無事佩抱樸之符其元氣爲舟微風爲柁涵王澤於五福得正數於二儀用道盡命之功蓋可得而述焉今夫溪飲壟耕林嬉水宴築蕭大園之蝸舍據阮孝緒之鹿牀取次爲達者之優游呼吸即至人之彷彿先生環隱勢於複否澡回流於激沙居然刁氏草堂有約揖桃巖李嶺詎必文君竹屋平分在智水仁山帶林薄於鸞山控烟雲於鰲閣容冶栽先生之柳隔塵世於桃源盤桓撫羅漢之松聽濤聲於蓬島狂歌擊衛卿之筋游仙排郭璞之雲既意行之似天亦耳鳴其積善割良田而襄祀事親無失親營寢廟而妥宗厘孝乎惟孝懼兄弟如路人聯族姓則纂修世本寶菑畚於經訓誦清芬而議復黨庠白露蒼葭盈盈一水曉風殘月淡淡三叉客待懸匏野渡免褰裳之涉人來躡屩康莊無

失足之虞義或市乎馮諼夜行獨有評乃高乎許邵陽報不差以商瞿之暮年三珠得譽植憲之之嘉樹一硯堪傳慰郗鑒於東床矯矯一鳴之鳥伴仲容於北阮昂昂千里之駒福有與而康休壽有木而葱鬱茲者花濃聚雪不煩綵幔之遮鸞流滿枝儼作胡盧之勸惠風和暢古日舒長瞳清漸方眼含水碧眉綠更秀面擬桃紅倚日月於巖前永保仲長統之性命爽精神於燈下未衰沈驥士之謄抄如其皓首拜官近甄權之百歲若使青雲得路多梁灝之八年壬林等翹跂生申敢工算亥願獻調言而酌桂無非酈縣甘泉請砭俗耳而攜柑會占梁園賦客時咸豐丁巳年春月吉旦眷姪吳壬林頓首拜撰

集齋宗兄七秩序

吳寧與吾台壤接而昆山川靈秀風俗淳美其間碩德高年蔚爲人望者所在多有而余宗集齋先生爲尤著先生好義樂善本於天性修橋梁以渡人施棺槨以掩骼凡利物濟人之事率爭先如不逮而其配樓氏亦每脫簪珥助之吾鄉之往來吳寧者咸樂道其大概善人長者之譽噪於遐邇予耳熟而心儀者舊矣既而秋白倪君自吳寧來從家大阮遊久於台每指數彼都物望亦必首稱集齋先生其遠祖及之公嘗尉吾郡之仙居集齋紹先德爲鄉邦所推重幼業儒不求仕進爲里塾師後生小子多所造就敦孝友性愷惻嚴毅剛方不苟言笑而接物則和氣藹然余日企慕常以無由良覲爲憾戊戌之春余循次輪銓奉文截取卸松陽教職將赴都由吳寧旋里乃便訪集齋出東郭門約三十里許曰前山則集齋鳴珂里也集齋一見如故止予宿見其子若孫但見鸞停鵠峙其嗣君啟元茂才也瑜珥

瑤環其孫枝之挺秀也爲叙宗系蓋亦自五季分徙與吾族居台者未分而源同剪燭劇談投若鍼芥亦既見止領善氣之迎人乃益嘆鄉人之稱道與秋白之推許爲不余欺也嗣後秋白以書來云是歲荷月二十三日爲集齋七秩懸弧之辰將製錦徵余言以介壽余維集齋聚族而居廬落相望溪山繚繞林木扶疎其地則仙都也澤躬以文宅心以厚教子有方愛人以德其行則賢者也菑畬經訓瀟灑林泉杖履優游飲和食德其跡則高人也傳曰有德則樂樂則能久以集齋之心處集齋之境身康強而子孫逢吉又奚俟善頌善禱斯徵壽之綏與慶之餘也哉爰書此以復秋白幸爲我代晉三爵也是爲序時乾隆戊戌夏月之吉甲子科舉人敕授文林郎山東高密縣知縣前處州府松陽縣學教諭天台宗弟檣溪雲昂頓首拜撰

祖四十七安人呂氏入秩壽叙

昔唐帝降二女於滄汭以觀其內周武王以元女大姬配虞閼父子滿而封於陳以備三恪爲胡氏宗美譚舊矣然帝室之名姝天潢之淑媛豈能多見於今求壺範之素嫺母儀之夙著者亦不數數觀則胡母呂太君之終溫且惠可風也太君系出東平爲發東望族具貞淑之姿秉撝謙之性女德之盛如月幾望蓋龍水鷄峰之秀特鍾焉及嬪前山實鄉翁則順舅姑和妯娌勉操持恩勤鞠育俾翁不以家計營心而惟是林麓江皋嘯歌自適且翁與諸昆仲倡議建宗祠慮不克勝任而太君則力贊成之族黨內有難處不決事而太君以片語啟翁而其事遂寢弱女子而具偉丈夫之識顧如此哉今壯月下浣六日爲太君八十帨辰矣克家者舞斑綵以承歡亢宗者合詞

壇而聲頌墳篋可作簫韶芹藻以當穀核雙峰絕頂飄紅霞紫氣於庭除古木高枝鳴輝鳳祥鸞於棟桷而太君覩板橋之高下猶思挽鹿之勞聽流水之潺湲每念浣紗之億諄諄以深宵絡緯戒微幃中午夜鷄窗諮諏膝下詔子若孫以不忘乃祖乃父之遺訓爲冰鑑當豫大豐亨之日而持謙或又如此則異日太史珥筆摘詞紀徽音而傳淑德二女大姬之聲靈亦必默啟之而使垂於不朽矣余戊春之任遇蘭譜李君士英於三關君以太君八旬壽文囑余秉筆余辭不文令自作而李君以爲余至戚文出余手是諛也敢借如椽以光門閥因述所聞於李君者而詳悉言之以當瑤島蓬壺之仙奏時龍飛乾隆三年歲著雍敦牂仲春下浣之吉賜進士第知直隸順天府昌平州事前翰林院庶吉士加三級年家眷弟張以瑀頓首拜撰

南房庭芝胡公行傳

曩胡君德操掌余家西席暇輒與余述其先子庭芝公行蹟既而德操舉進士爲朝廷用余亦絆於微名羈棲宦跡不獲與一二故人敦聚首歡良可慨也曩者德興公之寔德操以其誌屬余余既備述德興公之賢書之隧碣今德操復以先人狀屬余傳余則何辭按府君諱庭芝娶之東陽人國朝故名進士也先世自雪川來諱神者徙邑之南鄉南湖居焉高王父珣辛勤起家積資累萬曾王父張奉助教婺州路王祖父航保義郎龍川陳同甫先生銘其墓父勛承信郎監平江府福山鎮誥封通議大夫余先祖宗丞嘗爲之狀而止齋陳傳良銘焉娶於張有子四人府君其再索也府君生而秀異丰神俊雅

爲大父航公所鍾愛少讀書善記憶能文章比壯遊京師與諸名公遊講求古今理亂考時事得失毅然以修己治人爲己責至成進士授龍泉知縣龍泉俗澆難治大家巨室多動搖官府縣令鮮以理去者府君招集父老示以禮義強硬者治以法境內肅然爲治績最當道以才可大用交章薦剡會陝西騷動府君領帝簡承乏西安府知府詣任修城郭治器械嚴啓閉慎烽守諭以朝廷威德至霸陵臨下邽遍省鹿苑渭城雲陽新豐諸屬縣明年冠平選用廉明詰奸慝勸農桑緩刑罰興學校濬六輔渠水以廣溉民田暇輒登終南龍首臨漆沮鎬涇慨想先賢遺蹟與一二名士論文講學風化爲之一振民稱德焉事聞以府君氣節端亮議論激昂陞至監察御史於是始獲贈父如其官未幾告歸遂不復仕進云府君治家嚴而有法處兄弟間怡怡和悅教其子德操令習舉業讀武經七書講孫吳韜略時府君之卒德操年僅舞勺而學問才情已彬彬樹童子望矣今德操已爲世用雖積善餘慶事理之常而得力於府君誘掖之功者要不可誣生紹興戊午五月十二日午時嘉泰壬戌十二月初三日午時享年六十有五葬西原庵山夫人許氏祔子三次弼次元森衛淳祐丁未進士今爲高郵興化縣令孫男十一季宏子成子升子臨寅煥竟似翁父又釋鳴呼余與德操誼關師友恩甚同胞而府君則余之父執也其忍聽其行誼湮沒不彰哉雖然府君以有用之學出而幹濟時事顯親揚名使西安二十四縣間咸去思不置可謂澤及生民矣至於沐不次之擢卒獲榮歸故里徜徉自適倘所謂急流勇退出處咸宜者非耶謹爲縷述行實以示胡之後人時大宋寶祐三年歲次乙卯嘉平月小山厲文翁撰

東房純白先生自傳第十一世冲十一

純白先生姓胡氏諱助字履信一字古愚婺之東陽人上世來自雪川有諱某者爲仙居令始南湖居焉高祖諱某爲寧都主簿捨西山宅建覺明寺乃遷東湖曾祖諱某從東萊呂先生學與葛端獻公爲友祖諱某隱居行義鄉稱善士父諱某宋鄉貢進士用薦者授廸功郎辟史館實錄院主管文字今贈承事郎秘書監秘書郎從子請也先生幼穎悟性惇樸恬靜無機心弱不好弄稍長惟喜讀書自以早失怙恃孤苦刻志樹立所居山野去城府稍遠獨學無友里人咸笑其迂凡經史諸子百家之言悉究其大旨而不屑屑爲章句學嘗讀論語至君子食無求飽居無求安敏於事而慎於言就有道而正焉可謂好學也已及士志於道而耻惡衣惡食者未足與議也喟然有省遂志遠遊求天下之奇文壯觀平居酷好韓文未嘗一日不觀好陶淵明黃山谷之詩怡然自得於心聞子昂趙公以書名世故習晉唐人書得其法年踰三十郡舉茂才爲教官行中書授建康路儒學學錄建康六朝故都之地今行臺治爲監察御史日至泮宮勉勵諸生先生之爲學官也實兼大學齋訓導凡御史臺郎子弟悉從授書去後登科入仕者衆其顯最者前中書左丞呂仲實江西監憲劉伯溫遼省參政廉公亮今禮部尚書趙伯器是也治書侍御史趙公子英監察御史周公景遠禮部尚書曹公克明皆一時名德最相知周御史薦江浙士之博學通經能古文宜居館閣者七人首胡石塘徐方谷而先生與焉故侍御史劉公輔之時爲臺郎贈詩有曰作者七人爾君才十倍加士大夫欣豔之會司業吳草廬先生南歸過金陵

見先生所爲詩大加稱賞列在上品由是名振一時實皇慶初元也明年科舉開臺章例格不行復就行省調美化書院山長考滿赴禮部選再遊京師見知於翰林學士元公復初中書參政王公公繼學翰林侍講袁公伯長虞公伯生集賢學士貢公仲彰御史中丞馬公伯庸國子祭酒宋公誠甫皆待以奇士而於繼學公尤深知日相倡和俾二季從遊既授温州路儒學教授需次差遠用諸公薦改翰林國史院編修官至順初元從虞學士分院清暑上京虞公爲表先君之墓而銘焉今刻諸石秩滿久之又以例格保舉調右都威衛儒學教授衛聖廟在涿州新城白溝之澚昔者宋金之界其地荒涼蒼莽皆屯田士伍羽林老兵之居無所事教也秩滿再任國史院編修會修遼宋金三史議者謂先生宜秉筆而一時後生奔競進挾勢力求爲之中書總史事者往往視人情選擇非才貽笑當時同僚有不平者率先生上言辭職先生因曉之曰修舊史故史官職也然用否在朝廷昔之爲史者不有人禍必有天刑甚可懼也且以昌黎公職在史官而不肯爲史況我輩耶是宜退避何庸較同僚服其言識者聽之秩滿授承事郎太常博士年歲七十竟告老於朝致仕以歸實至正五年也先生凡兩任史官適遇大比之歲三次中書選爲河南山東燕南鄉試官所取多得人於河南得余廷心進士第二烏希說張約中爲時聞人燕南得張士堅進士第一先生貌清古氣稟雖弱而善自調理少疾病絕嗜慾平生誠實無僞見人有善亟稱之與人交淡而久人益敬之素薄世利故於人無怨惡若釋老二氏之學亦知其微而不惑焉嘗著大拙先生小傳寓言以自況又取莊子漢陰抱甕語自號純白道人初在山中所作曰巢雲稿至建康曰白下稿往

來京師幾三十年有京華雜興上京紀遊前後續稿命子編集合三十卷名之曰純白齋類稿觀其文可以知其人或譏先生好文辭而懶著書先生聞之曰道六經而文不六經者有之未有文六經而道不六經者也道其體也文其用也體用一原文所以明乎道者也斯道也自堯舜禹湯文武周公孔子顏孟既沒而不得其傳至宋濂洛諸大儒起唱鳴道學以續其傳南渡朱張呂三先生繼起私淑其徒相與講貫斯道復明而朱子晚年定論又有以集諸儒之大成然後聖人之道昭如日星諸子百家之言折衷歸一如水赴海學者唯當服行而已若夫近世著書之士徒剽竊古人糠粃或執已見穿鑿其說是書之蠹也何補斯道邪先生既歸數年兩霑賜幣顧鄉間舊友無在者若文懿先生許益之翰林柳道傳禮部吳正傳修撰張子長皆繼死不能不爲之興懷傷感獨侍講黃公晉卿巋然靈光又不能時相會聚可勝嘆哉今先生年七十有三康健如少壯耳目聰明能寫細字手不釋卷可謂老而好學者也先生凡兩娶皆陳氏贈封宜人俱先卒子二長璋遼陽儒學學正輒棄去隱居治田園次瑜蔭賀州通判女一適温州陰陽學正陳樵孫男六人長應文習進士業次朋壽衢州路學正學傳修齡科傳奕壽孫女五長適許繼祖次適何陶民次天次許適陳次幼二子爭欲迎養奉甘旨而先生反不樂獨居故廬冰雪一榻自奉如深山道人茲所以壽未艾也術者或謂可望八十雖有命詎可必哉於是輒先命戒二子曰我死歛以時服不得用浮屠氏作佛事蚤營葬地或祔先隴不拘陰陽若違吾言是爲不孝亦不必求人作行狀墓銘故吾自爲之傳以遺後之人云時至正十年庚寅歲冬十一月晦書於純白齋